

Pendaftaran Pemilih

Umum

Punca Kuasa

SPR melaksanakan fungsi pendaftaran pemilih dan penyemakan daftar pemilih berdasarkan kepada tiga (3) punca kuasa berikut:

1. Perkara 113 dan 119 Perlembagaan Persekutuan;
2. Akta Pilihan Raya 1958; dan
3. Peraturan-Peraturan Pilihan Raya (Pendaftaran Pemilih) 2002.

Kategori Pemilih

Kategori pemilih terbahagi kepada dua (2) iaitu:

1. Pengundi biasa; dan
2. Pengundi tidak hadir (PTH).

Pengundi tidak hadir (PTH) terdiri daripada:

1. Anggota tentera yang berkhidmat secara tetap;
2. Pasangan kepada anggota tentera yang berkhidmat secara tetap;
3. Anggota polis yang berkhidmat secara tetap selain anggota Pasukan Polis Sukarelawan Simpanan; dan
4. Pasangan kepada polis Pasukan Gerakan Am (PGA).

Urusan Pendaftaran Pemilih

Pendaftaran pemilih baharu

Mulai 15 Disember 2021, **pendaftaran pemilih baharu adalah secara automatik.** Berdasarkan Perkara 119, Perlembagaan Persekutuan, kelayakan untuk didaftarkan sebagai pemilih baharu adalah:

(a) Warganegara Malaysia;

(b) Berumur 18 tahun dan ke atas;

(c) Bermastautin di mana-mana bahagian pilihan raya (mempunyai alamat kediaman yang didaftarkan dengan Jabatan Pendaftaran Negara); dan

(d) Tidak hilang kelayakan berdasarkan Perkara 119 (3) Perlembagaan Persekutuan.

Takrifan **hilang kelayakan** untuk didaftarkan sebagai pemilih berdasarkan Perkara 119 (3) Perlembagaan Persekutuan adalah:

(a) pada tarikh kelayakan, ditahan sebagai orang tidak sempurna akal atau sedang menjalani hukuman pemenjaraan; atau

(b) sebelum tarikh kelayakan dia telah disabitkan atas suatu kesalahan di dalam mana-mana bahagian Komanwel dan dihukum dengan hukuman mati atau pemenjaraan selama tempoh melebihi dua belas bulan dan pada tarikh kelayakan itu dia masih kena menjalani apa-apa hukuman bagi kesalahan itu.

SPR mendaftarkan warganegara berumur 18 tahun dan ke atas yang tidak hilang kelayakan ini berdasarkan pengesahan kewarganegaraan dan maklumat peribadi yang diterima daripada Jabatan Pendaftaran Negara termasuklah maklumat alamat mastautin. **Penetapan bahagian pilihan raya bagi seseorang pemilih adalah berdasarkan kepada alamat mastautin terkini di Jabatan Pendaftaran Negara.**

Warganegara yang didaftarkan sebagai pemilih baharu secara automatik akan diperaku dalam daftar pemilih tambahan setiap bulan sebelum layak untuk mengundi dalam suatu pilihan raya umum atau kecil.

Pertukaran Bahagian Pilihan Raya

Seseorang pemilih yang telah berpindah tempat mastautin dan berhasrat menukar bahagian pilihan rayanya boleh memohon pertukaran bahagian pilihan raya. **Pemilih hendaklah terlebih dahulu mengemaskini alamat mastatutin mereka di Jabatan Pendaftaran Negara.**

Permohonan pertukaran bahagian pilihan raya boleh dikemukakan melalui saluran berikut:

1. Secara dalam talian di pautan <https://myspr.spr.gov.my>;
2. Ibu Pejabat SPR;
3. Pejabat Pilihan Raya Negeri di seluruh negara;
4. Pejabat Pos di seluruh negara; dan
5. Program Outreach SPR.

Semua permohonan pertukaran bahagian pilihan raya yang diterima melalui Borang A akan diproses dan disemak sebelum pemilih diperaku untuk melayakkannya mengundi dalam bahagian pilihan raya yang baru dalam suatu pilihan raya umum atau kecil.

Pertukaran Status / Kategori Pengundi

Seseorang pemilih yang telah didaftarkan sebagai pemilih di bawah kategori pengundi biasa boleh memohon menukar status / kategori pengundi kepada pengundi tidak hadir sekiranya pemilih termasuk dalam salah satu daripada kategori berikut:

1. Anggota tentera yang berkhidmat secara tetap;
2. Pasangan kepada anggota tentera yang berkhidmat secara tetap;
3. Anggota polis yang berkhidmat secara tetap dan selain anggota Pasukan Polis Sukarelawan Simpanan; dan
4. Pasangan kepada polis Pasukan Gerakan Am (PGA).

Mana-mana orang daripada empat (4) kategori di atas yang telah menamatkan perkhidmatan hendaklah memohon semula kategori pengundi untuk didaftarkan di bawah kategori pengundi biasa.

Permohonan pertukaran status / kategori pengundi boleh dikemukakan melalui saluran berikut:

1. Secara dalam talian di <https://myspr.spr.gov.my>;
2. Ibu Pejabat SPR;
3. Pejabat-Pejabat Pilihan Raya Negeri di seluruh negara;
4. Pejabat Pos di seluruh negara; atau
5. Program Outreach SPR.

Semua permohonan pertukaran status / kategori pengundi akan diterima melalui Borang A akan diproses dan disemak sebelum pemilih diperaku untuk melayakkannya mengundi sama ada sebagai pengundi biasa atau pengundi awal atau pengundi pos dalam suatu pilihan raya umum atau kecil.

Pemerakuan dan Pewartaan Daftar Pemilih Tambahan

SPR memperaku dan mewartakan Daftar Pemilih Tambahan (DPT) setiap bulan. DPT ini mengandungi maklumat seperti berikut :

1. Nama warganegara berumur 18 tahun dan ke atas yang didaftarkan sebagai pemilih baharu secara automatik;
2. Nama pemilih yang memohon pertukaran bahagian pilihan raya; dan

3. Nama pemilih yang memohon pertukaran status / kategori pengundi.

Notis pemerakuan DPT ini diwartakan melalui Warta Kerajaan dan boleh dicapai di Portal Jabatan Peguam Negara iaitu <https://lom.agc.gov.my/>

Semakan Daftar Pemilih Tambahan

Daftar Pemilih Tambahan (DPT) yang telah diperaku dan diwartakan ini terbuka untuk semakan selama 30 hari mulai dari tarikh pewartaan notis pemerakuan DPT. Semakan ini boleh dibuat melalui 5 kaedah berikut:

1. Portal SPR di pautan <https://www.spr.gov.my>; atau <https://mysprsemak.spr.gov.my>;
2. Portal rasmi Pejabat-Pejabat Pilihan Raya Negeri di pautan <http://ppn.spr.gov.my>;
3. Aplikasi dalam talian di pautan <https://myspr.spr.gov.my>;
4. Aplikasi mudah alih **MySPR Semak**; atau
5. Hotline Semakan Pendaftaran Pemilih di talian 03-8892 7218.

Dalam tempoh semakan ini, mana-mana pihak yang layak boleh mengemukakan TUNTUTAN atau BANTAHAN melalui kaedah yang ditetapkan oleh SPR.

Tuntutan

Dalam tempoh semakan ini, warganegara yang berumur 18 tahun dan ke atas, pemilih yang telah memohon pertukaran bahagian pilihan raya dan pertukaran status / kategori pengundi yang mendapati namanya tiada dalam DPT yang terbuka untuk semakan boleh mengemukakan TUNTUTAN. Tiada bayaran fi dikenakan bagi tuntutan.

Selain itu, mana-mana pemilih yang namanya ada dalam DPT yang terbuka untuk semakan mendapati terdapat kesilapan maklumat atau kesilapan bahagian pilihan raya juga boleh mengemukakan TUNTUTAN.

TUNTUTAN boleh dikemukakan melalui Borang C boleh dikemukakan melalui kaedah berikut:

1. Secara dalam talian di pautan <https://myspr.spr.gov.my>; atau
2. Hadir ke Pejabat Pilihan Raya Negeri yang berkenaan pada waktu pejabat pada mana-mana hari bekerja.

Bantahan

Dalam tempoh semakan ini juga, mana-mana pemilih berdaftar di suatu bahagian pilihan raya yang membuat semakan dan berhasrat membuat BANTAHAN ke atas kemasukan nama pemilih yang membuat pertukaran ke bahagian pilihan rayanya.

Syarat-syarat bagi BANTAHAN ialah seperti berikut :

1. Pembantah mestilah pemilih berdaftar dalam bahagian pilihan raya;
2. Mengemukakan bantahan sehingga maksimum 20 orang pemilih dalam bahagian pilihan raya yang sama;
3. Membayar fi sebanyak RM10 bagi setiap orang yang dibantah (OKB); dan
4. Hadir ke Pejabat Pilihan Raya Negeri yang berkenaan pada waktu pejabat pada mana-mana hari bekerja untuk mengemukakan Borang D serta bayaran fi.

Urusan Pengemaskinian Daftar Pemilih

Pembetulan Maklumat Pemilih

Seseorang pemilih yang menyemak dan mendapati terdapat kesilapan maklumat peribadinya, boleh memohon untuk pembetulan kepada SPR. Pembetulan maklumat peribadi meliputi maklumat-maklumat seperti berikut:

1. Nombor kad pengenalan 12 angka;
2. Nombor perkhidmatan tentera/polis;
3. Nombor kad pengenalan lama;
4. Nama;
5. Tarikh Lahir;
6. Jantina.

Di samping itu, pemilih yang mendapati namanya didaftarkan dalam bahagian pilihan raya yang salah juga boleh memohon pembetulan bahagian pilihan raya dengan SPR.

Permohonan pembetulan maklumat pemilih ini boleh dikemukakan melalui kaedah berikut:

1. Mengemukakan TUNTUTAN sekiranya masih dalam tempoh semakan DPT;
2. Aduan bertulis secara e-mel atau surat;

3. Aduan di Portal SPR di pautan <https://www.spr.gov.my/ms/aduan-pertanyaan>; atau
4. Hotline SPR di talian 03-8892 7218.

Pemotongan Nama Pemilih

SPR juga dari semasa ke semasa memotong nama pemilih yang hilang kelayakan kerana sebab-sebab berikut :

1. Telah meninggal dunia; dan
2. Telah hilang taraf kewarganegaraan.

Tindakan memotong nama pemilih ini adalah berdasarkan maklumat yang diterima daripada Jabatan Pendaftaran Negara (JPN).

Pengurusan Daftar Pemilih

Penjualan Daftar Pemilih Induk dan Daftar Pemilih Tambahan

SPR menyediakan Daftar Pemilih Induk (DPI) dan Daftar Pemilih Tambahan (DPT) untuk dijual kepada mana-mana pihak yang diluluskan oleh SPR. DPI dan DPT ini boleh dibeli daripada SPR dalam format berikut:

1. Buku; dan
2. Cakera padat (CD) atau *pendrive* – format *Portable Document Format* (pdf) atau *Microsoft Access* (mdb).

Kadar harga jualan bagi DPI dan DPT adalah berdasarkan kepada jumlah pemilih dan akan dikemas kini dari semasa ke semasa.

Selain itu, SPR juga menyediakan Statistik Daftar Pemilih terkini setiap bulan dalam format *Portable Document Format* (pdf) mengikut negeri dan bahagian pilihan raya seperti berikut:

1. Statistik Kategori Pemilih Mengikut Bahagian Pilihan Raya;
2. Statistik Jantina mengikut Bahagian Pilihan Raya; dan
3. Statistik Umur mengikut Bahagian Pilihan Raya.

Mana-mana pihak yang berhasrat mendapatkan DPI, DPT dan Statistik Daftar Pemilih boleh mengemukakan permohonan bertulis secara e-mel atau surat kepada:

1. Setiausaha SPR; atau
2. Pengarah Pilihan Raya Negeri.

Pelaksanaan Umur Kelayakan Pengundi 18 Tahun Dan Pendaftaran Pemilih Secara Automatik (PPSA)

Apa Itu Pengundi 18?

Semua warganegara yang telah mencapai umur 18 tahun dan ke atas layak untuk didaftarkan sebagai pemilih.

Pengundi 18 layak mengundi setelah SPR memperaku danewartakan daftar pemilih tambahan.

Apa Itu PPSA?

Semua warganegara yang telah mencapai umur 18 tahun dan ke atas layak untuk didaftarkan sebagai pemilih.

Warganegara yang layak serta mempunyai maklumat lengkap berdasarkan rekod Jabatan Pendaftaran Negara (JPN) akan didaftarkan sebagai pemilih tanpa memohon kepada SPR.

Pemilih baharu yang layak boleh menyemak maklumat pengundian selepas 16 Januari 2022.

Tarikh Berkuatkuasa

15 Disember 2021

Syarat untuk Didaftarkan Sebagai Pemilih Secara Automatik

- **Warganegara Malaysia**
- **18 tahun ke atas**
- **Menetap di alamat seperti dalam MyKad**
- **Tidak hilang kelayakan sebagai pemilih mengikut undang-undang**

Semak Maklumat

Setelah mencapai umur 18 tahun, maklumat pengundian boleh disemak selepas **16 hari bulan bulan berikutnya** melalui:

- **Portal semakan daftar pemilih:**
<https://mysprsemak.spr.gov.my/>
- **Aplikasi MySPR Semak**
- **Hotline SPR:**
[03-8892 7018](tel:03-88927018)

Kemaskini Alamat di JPN

Sekiranya alamat yang didaftarkan berbeza dengan tempat tinggal sekarang, lakukan pertukaran bahagian pilihan raya melalui MySPR Daftar.

<https://mysprsemak.spr.gov.my/>

SOALAN-SOALAN LAZIM

PELAKSANAAN UMUR KELAYAKAN PENGUNDI 18 TAHUN DAN PENDAFTARAN PEMILIH SECARA AUTOMATIK (PPSA)

PENGENALAN

1. **Apakah yang dimaksudkan dengan pelaksanaan umur kelayakan pengundi 18 tahun?**

Ini bermaksud semua warganegara Malaysia yang telah mencapai umur 18 tahun dan ke atas adalah layak untuk didaftarkan sebagai pemilih oleh SPR apabila dikuatkuasakan.

2. **Apakah yang dimaksudkan dengan Pendaftaran Pemilih Secara Automatik (PPSA)?**

Warganegara Malaysia yang layak serta mempunyai maklumat lengkap berdasarkan rekod di Jabatan Pendaftaran Negara (JPN) akan didaftarkan sebagai pemilih tanpa perlu lagi memohon kepada SPR.

3. **Adakah PPSA ini melibatkan pendaftaran pertukaran bahagian pilihan raya?**

Tidak. Mereka yang telah berdaftar sebagai pemilih tetapi ingin membuat pertukaran bahagian pilihan raya sama ada bahagian pilihan raya Parlimen atau DUN, perlu membuat permohonan kepada SPR.

4. **Adakah PPSA ini melibatkan pertukaran status Pengundi Tidak Hadir (PTH)?**
Tidak. Mereka yang telah berdaftar sebagai pemilih tetapi ingin membuat pertukaran status pemilih Pengundi Tidak Hadir (PTH) kepada pengundi biasa atau sebaliknya, perlu membuat permohonan kepada SPR.

PELAKSANAAN PENGUNDI 18 TAHUN DAN PPSA

5. **Adakah pengundi 18 tahun akan dilaksanakan secara bersekali dengan PPSA?**
Ya.
6. **Bilakah pengundi 18 tahun dan PPSA akan dikuatkuasakan?**
Pelaksanaan kedua-duanya telah dikuatkuasakan pada 15 Disember 2021.
7. **Bilakah pengundi 18 tahun ini layak untuk mengundi setelah didaftarkan secara automatik?**
Selepas SPR memperaku danewartakan daftar pemilih tambahan.
8. **Apabila warganegara Malaysia mencapai umur 18 tahun, bilakah semakan maklumat pengundian boleh dilaksanakan?**
Maklumat pengundian boleh disemak selepas 16hb bulan berikutnya.
9. **Berapakah tempoh bagi seseorang warganegara Malaysia yang telah mencapai umur 18 tahun akan didaftarkan sebagai pemilih secara automatik oleh SPR?**
Proses pendaftaran pemilih secara automatik ini akan mengambil masa sehingga sebulan setengah dari hari individu berkenaan mencapai umur 18 tahun.
10. **Apakah syarat untuk didaftarkan sebagai pemilih secara automatik?**
a) Warganegara Malaysia
b) Berumur 18 tahun ke atas
c) Menetap di alamat seperti di kad pengenalan
d) Tidak hilang kelayakan sebagai pemilih mengikut undang-undang.
11. **Berapakah jumlah warganegara Malaysia yang dijangkakan terlibat apabila pengundi 18 tahun dan PPSA ini dikuatkuasakan?**
Seramai 5.7 juta orang pemilih baharu telah didaftarkan.
12. **Berapakah jumlah warganegara berumur 18 hingga 20 tahun yang terlibat dengan PPSA apabila dikuatkuasakan?**
Seramai 1.4 juta orang pemilih baharu terlibat.
13. **Bilakah pemilih baharu yang didaftarkan secara automatik boleh menyemak maklumat pengundian?**

Pemilih baharu yang layak boleh menyemak maklumat pengundian selepas 14 Januari 2022.

14. Di manakah pemilih baharu yang didaftarkan secara automatik boleh menyemak maklumat pengundian?

Pemilih baharu boleh menyemak maklumat pengundian di:

- a) Portal SPR di pautan <https://www.spr.gov.my> atau <https://mysprsemak.spr.gov.my>
- b) Aplikasi mudah alih MySPR Semak
- c) Portal rasmi Pejabat-Pejabat Pilihan Raya Negeri di pautan <http://ppn.spr.gov.my>
- d) Hotline SPR di talian 03-8892 7018.

15. Bagaimana sekiranya alamat yang telah didaftarkan sebagai pemilih secara automatik ini berbeza dengan alamat tempat tinggal sekarang?

Pemilih boleh membuat pengemaskinian alamat tersebut dengan pihak JPN.

Seterusnya, pemilih hendaklah memohon pertukaran bahagian pilihan raya dengan SPR di mana-mana Pejabat Pilihan Raya Negeri (PPN) yang berkenaan, Pejabat Pos atau melalui MySPR Daftar di <https://mysprdaftar.spr.gov.my>.

16. Adakah terdapat warganegara berumur 21 tahun ke atas yang tidak didaftarkan secara automatik?

Ya. Mereka yang mempunyai alamat tidak lengkap tidak didaftarkan secara automatik. Begitu juga mereka yang hilang kelayakan sebagai pemilih mengikut undang-undang.

17. Adakah individu yang memiliki kad pengenalan palsu akan didaftarkan?

Tidak. SPR hanya akan mendaftarkan warganegara Malaysia yang telah disahkan taraf kewarganegaraannya oleh JPN sebagai pemilih secara automatik.

18. Adakah warganegara yang mempunyai alamat umum atau tidak lengkap di JPN akan turut didaftarkan oleh SPR?

Tidak. SPR tidak dapat menentukan bahagian pilihan raya yang tepat bagi warganegara tersebut.

PROSEDUR PELAKSANAAN PPSA

19. Apakah prosedur-prosedur yang terlibat dalam pelaksanaan PPSA ini?

Pelaksanaan PPSA ini akan melibatkan empat (4) prosedur utama iaitu:

- a) Penerimaan dan pemprosesan maklumat warganegara
- b) Penetapan bahagian pilihan raya

- c) Pemerakuan dan pewartaan Daftar Pemilih Tambahan (DPT)
- d) Semakan DPT.

20. Bagaimanakah penerimaan dan pemprosesan maklumat warganegara ini dilaksanakan oleh SPR?

Maklumat warganegara yang telah mencapai umur 18 tahun diterima daripada JPN dan diproses setiap hari untuk didaftarkan secara automatik tanpa perlu warganegara membuat permohonan.

21. Bagaimanakah SPR memastikan warganegara yang hilang kelayakan sebagai pemilih tidak didaftarkan?

SPR membuat semakan silang sama ada secara dalam talian atau manual dengan pihak JPN, Jabatan Penjara Malaysia, Kementerian Kesihatan Malaysia (KKM), dan Kementerian Luar Negeri (KLN) bagi memastikan hanya mereka yang layak sahaja didaftarkan sebagai pemilih.

22. Bagaimanakah penetapan bahagian pilihan raya ini dilaksanakan oleh SPR?

Maklumat warganegara akan diproses untuk semakan kelayakan dan penetapan bahagian pilihan raya Parlimen dan Negeri setiap hari. Penetapan bahagian pilihan raya ini adalah berdasarkan alamat lengkap di JPN. Proses ini perlu diselesaikan selewat-lewatnya pada 15hb bulan berikutnya.

23. Bilakah pemerakuan dan pewartaan DPT dilaksanakan oleh SPR?

DPT secara bulanan ini akan diperaku selewat-lewatnya pada 15hb bulan berikutnya. Manakala, pewartaan DPT tersebut adalah pada hari bekerja berikutnya dalam bulan berkenaan.

PENAMBAHBAIKAN BAHARU DALAM PPSA

24. Apakah perbezaan mekanisme pendaftaran sedia ada berbanding PPSA ini?

Lima (5) perbezaan melalui pelaksanaan PPSA ini adalah:

- a) Pemilih baharu tidak lagi didaftarkan secara permohonan menggunakan Borang A tetapi didaftarkan secara automatik menggunakan data warganegara yang diperolehi daripada JPN.
- b) Pemerakuan dan pewartaan DPT akan dilaksanakan pada setiap bulan berbanding setiap suku tahun sebelum ini.
- c) Tiada lagi pameran Rang DPT (RDPT) dilaksanakan.
- d) Tuntutan dan Bantahan hanya boleh dibuat dalam tempoh semakan DPT.
- e) Bantahan hanya dibenarkan bagi permohonan yang melibatkan pertukaran bahagian pilihan raya sahaja.

25. Apakah impak yang signifikan melalui penambahbaikan baharu ini?

Proses pendaftaran pemilih baharu akan hanya mengambil masa sehingga 1 bulan setengah berbanding prosedur sedia ada yang mengambil masa sehingga 4 hingga 5 bulan untuk didaftarkan.

TUNTUTAN DAN BANTAHAN

26. Adakah tuntutan atau bantahan boleh dibuat ke atas DPT yang telah diperakui dan diwartakan oleh SPR?

Ya. Dalam tempoh semakan DPT, SPR membenarkan mana-mana orang yang berkecenderungan untuk mengemukakan tuntutan atau bantahan ke atas DPT tersebut.

27. Berapa lamakah tempoh semakan DPT dibuka untuk proses tuntutan atau bantahan?

DPT Bulan 12/2021 akan dibuka untuk semakan selama 6 bulan mulai 14 Januari 2022 hingga 13 Julai 2022 dan sebarang tuntutan atau bantahan ke atas DPT Bulan 12/2021 boleh dikemukakan dalam tempoh semakan ini. Walau bagaimanapun, tempoh semakan DPT bagi bulan-bulan berikutnya ialah selama satu bulan sahaja.

28. Apakah tuntutan yang dibenarkan dalam tempoh semakan DPT ini?

a) Mana-mana warganegara yang telah mencapai umur 18 tahun dan ke atas yang mendapati namanya tiada dalam DPT.

b) Mana-mana pemilih berdaftar yang mendapati terdapat kesilapan pada butiran peribadinya atau penetapan kawasan pendaftaran bahagian pilihan rayanya.

29. Apakah bantahan yang dibenarkan dalam tempoh semakan DPT ini?

Pemilih yang telah berdaftar dalam sesuatu bahagian pilihan raya boleh mengemukakan bantahan terhadap mana-mana pemilih yang memohon pertukaran bahagian pilihan raya sahaja. Namun, tiada bantahan dibenarkan ke atas pemilih yang didaftarkan secara automatik.

30. Apakah yang perlu dilakukan sekiranya nama seseorang warganegara yang layak tiada semasa semakan maklumat pengundian dibuat selepas 14 Januari 2022?

Individu berkenaan boleh membuat tuntutan kepada SPR dengan mengisi Borang C melalui muat turun dari Portal Pejabat Pilihan Raya Negeri di pautan <http://ppn.spr.gov.my> dan mengemukakan borang tersebut di Pejabat Pilihan Raya Negeri (PPN) yang berkenaan pada hari bekerja mulai jam 8.00 pagi hingga 5.00 petang atau mengisi Borang C secara dalam talian di Portal SPR melalui pautan <https://myspr.spr.gov.my>.

31. Apakah yang perlu pemilih baharu lakukan sekiranya terdapat kesilapan butiran peribadi atau kesilapan penetapan kawasan pendaftaran bahagian pilihan raya semasa semakan maklumat pengundian?

Individu berkenaan boleh membuat tuntutan kepada SPR dengan mengisi Borang C melalui muat turun dari Portal Pejabat Pilihan Raya Negeri di pautan

<http://ppn.spr.gov.my> dan mengemukakan borang tersebut di Pejabat Pilihan Raya Negeri (PPN) yang berkenaan pada hari bekerja mulai jam 8.00 pagi hingga 5.00 petang atau mengisi Borang C secara dalam talian di Portal SPR melalui pautan <https://myspr.spr.gov.my>.

32. Adakah sebarang bayaran atau fi dikenakan kepada tuntutan yang dibuat?

Tiada.

33. Apakah yang perlu dilakukan oleh pemilih berdaftar sekiranya terdapat bantahan terhadap mana-mana pemilih yang memohon pertukaran ke bahagian pilihan rayanya?

Pemilih yang telah berdaftar dalam sesuatu bahagian pilihan raya boleh membuat bantahan kepada SPR dengan mengisi Borang D melalui muat turun dari Portal Pejabat Pilihan Raya Negeri di pautan <http://ppn.spr.gov.my> dan mengemukakan borang tersebut di Pejabat Pilihan Raya Negeri (PPN) yang berkenaan pada hari bekerja mulai jam 8.00 pagi hingga 5.00 petang.

34. Adakah sebarang bayaran atau fi dikenakan kepada bantahan yang dibuat?

Fi sebanyak RM10 akan dikenakan bagi setiap nama yang dibantah.

35. Adakah pembantah boleh membuat rayuan sekiranya bantahan ditolak?

Ya.

36. Adakah sebarang bayaran atau fi dikenakan kepada rayuan yang dibuat?

Fi sebanyak RM5 akan dikenakan bagi setiap rayuan.

37. Bilakah tuntutan dan bantahan ini boleh dilaksanakan?

Tuntutan dan bantahan hanya boleh dilaksanakan sepanjang tempoh Semakan Daftar Pemilih Tambahan yang telah ditetapkan oleh SPR.

38. Berapa lamakah tempoh yang diambil oleh SPR untuk menyelesaikan setiap tuntutan, bantahan atau rayuan yang dibuat?

Setiap tuntutan, bantahan atau rayuan akan diberikan perhatian sewajarnya dan diselesaikan dengan secepat mungkin tanpa perlu menunggu tempoh Semakan DPT bagi bulan berkenaan tamat.

IMPLIKASI PELAKSANAAN PENGUNDI 18 TAHUN DAN PPSA

39. Adakah pelaksanaan Pengundi 18 tahun akan memberi kesan terhadap peratus keluar mengundi di sesuatu pilihan raya yang diadakan?

Peratusan keluar mengundi adalah bergantung kepada bilangan pemilih berdaftar yang keluar mengundi.

40. Adakah daftar pemilih 18 tahun dan PPSA akan digunakan dalam Pilihan Raya Umum ke-15?

Ya. Bagi PRU Ke-15, setelah pendaftaran pengundi 18 tahun dan pendaftaran pemilih secara automatik dikuatkuasakan dan tertakluk kepada Daftar Pemilih Tambahan (DPT) terkini yang telah diwartakan.

Perjalanan Pilihan Raya

Sejak tahun 1957, Malaysia mengekalkan sistem politik pelbagai parti yang mana parti politik yang memperoleh undi paling banyak kerusi di Dewan Rakyat atau Dewan Undangan Negeri boleh menubuhkan Kerajaan Persekutuan atau Negeri. Sistem yang digunakan di Malaysia berasaskan '*First-Past-The-Post-System*'. Ini bermakna calon-calon yang memperoleh majoriti akan diisytihar pemenang di bahagian pilihan raya yang berkenaan.

ELEMEN - ELEMEN PENTING PILIHAN RAYA

Elemen-elemen penting pilihan raya adalah:

- i. Bahagian Pilihan Raya
- ii. Pemilih
- iii. Calon
- iv. Proses Pilihan Raya

JENIS - JENIS PILIHAN RAYA

Terdapat dua jenis pilihan raya iaitu:

- i. Pilihan Raya Umum
- ii. Pilihan Raya Kecil

Pilihan Raya Umum diadakan apabila Parlimen atau Dewan Undangan Negeri dibubarkan atau terbubar sendiri selepas tamat tempoh 5 tahun. Pilihan Raya Kecil pula berlaku untuk mengisi kekosongan kerusi Parlimen atau Dewan Undangan Negeri di luar jangka disebabkan oleh:

- i. Kematian
- ii. Perletakan jawatan
- iii. Hilang Kelayakan
- iv. Pembatalan keputusan pilihan raya oleh Mahkamah Pilihan Raya

Undang-undang dan peraturan pilihan raya

Bagi memudahkan pelaksanaan pilihan raya, beberapa undang-undang dan peraturan telah digubal untuk memastikan prosedur pilihan raya dipatuhi sepenuhnya. Undang-undang dan peraturan-peraturan yang digubal adalah seperti yang berikut:

- a. Perlembagaan Persekutuan;
- b. Perlembagaan Negeri;
- c. Akta Suruhanjaya Pilihan Raya 1957;
- d. Akta Pilihan Raya, 1958 (Akta 19);
- e. Akta Kesalahan Pilihan Raya, 1954 (Akta 5);
- f. Peraturan-peraturan Pilihan Raya (Penjalanan Pilihan Raya) 1981;
- g. Peraturan-peraturan Pilihan Raya (Pendaftaran Pemilih) 2002;
- h. Peraturan-peraturan Pilihan Raya (Pengundian Pos) 2003.

Semua undang-undang dan peraturan-peraturan ini adalah berkait secara langsung dengan proses pilihan raya. Walau bagaimanapun terdapat juga beberapa undang-undang yang tidak mempunyai kaitan secara langsung dengan proses pilihan raya, tetapi memainkan peranan dalam kelancaran penjalanan pilihan raya. Antaranya termasuklah Akta Polis 1967; Akta Hasutan 1958; Akta Rahsia Rasmi 1971; dan Akta Keselamatan Dalam Negeri, 1960 dan Akta SPRM 2009.

Proses Pilihan Raya

Pilihan Raya Umum atau Pilihan Raya Kecil di Malaysia melibatkan enam (6) peringkat iaitu pengeluaran writ, penamaan calon, kempen pilihan raya, pengundian, penjumlahan rasmi undi dan pengumuman keputusan pilihan raya.

i. Pengeluaran Writ

Apabila berlaku pembubaran Parlimen atau Dewan Undangan Negeri atau terdapat kekosongan di luar jangka, SPR akan mengeluarkan writ iaitu surat kuasa untuk menjalankan pilihan raya kepada Pegawai Pengurus. Pada masa yang sama satu notis pilihan raya akan diwartakan dan ditampal di tempat-tempat yang mudah untuk semakan orang ramai. Notis tersebut akan mengandungi tarikh penamaan dan tarikh pengundian yang akan dijalankan.

ii. Penamaan Calon

Pada hari penamaan calon yang ditetapkan, diantara jam 9.00 pagi hingga 10.00 pagi, Pegawai Pengurus akan menerima borang-borang penamaan dari calon, pencadang atau penyokong atau ketiga-tiganya sekali. Selain dari penyerahan borang penamaan, calon, pencadang atau penyokong perlu juga menyertakan deposit pilihan raya dan Borang Akaun Berkanun iaitu Borang 5 untuk calon bagi ahli Dewan Rakyat dan Borang 5A untuk calon bagi Ahli Dewan Undangan Negeri. Borang-borang ini perlu dimatikan setem di Pejabat Duti Setem. Pegawai Pengurus akan mengisytiharkan calon-calon yang layak bertanding selepas selesai proses penamaan calon. Jika hanya seorang saja calon yang layak, Pegawai Pengurus akan mengumumkan calon tersebut menang tanpa bertanding.

iii. Kempen Pilihan Raya

Selepas sahaja urusan penamaan calon selesai, calon-calon atau wakilnya bolehlah memulakan urusan kempen yang terdiri daripada pemasangan poster/*banner*, ceramah, pengedaran risalah dan kempen dari rumah ke rumah. Aktiviti kempen ini perlu dihentikan tepat pada jam 12.00 tengah malam sebelum hari mengundi. Untuk tujuan kempen, calon-calon dikehendaki membayar deposit bahan kempen sebanyak RM5,000.00 bagi pilihan raya Parlimen dan RM3,000.00 bagi pilihan raya Dewan Undangan Negeri kepada SPR. Begitu juga dengan pemasangan poster/*banner* calon-calon perlu membayar wang deposit kepada Pihak Berkuasa Tempatan (PBT). Bagi membolehkan calon-calon mengadakan

ceramah terbuka mereka perlu mendapat kelulusan/permit dari pihak polis.

iv. **Pengundian**

Pada hari mengundi yang telah ditetapkan, pemilih-pemilih yang namanya ada di dalam daftar pemilih akan keluar mengundi di pusat-pusat mengundi yang telah ditetapkan. Pada amnya masa mengundi yang telah ditetapkan oleh SPR ialah antara jam 8.00 pagi hingga 6.00 petang diseluruh Semenanjung Malaysia dan mulai jam 7.30 pagi hingga 5.30 petang di Sabah dan Sarawak. Namun demikian terdapat juga kawasan yang masa mengundinya dipendekkan atas alasan keselamatan dan kesukaran logistik terutamanya di Sabah dan Sarawak. Setiap pusat mengundi biasanya mempunyai lebih dari satu tempat mengundi (saluran). Ianya diketuai oleh seorang Ketua Tempat Mengundi dan dibantu oleh dua (2) hingga empat (4) orang Kerani Pengundian.

Bagi pengundi awal iaitu anggota tentera dan pasangan serta anggota polis dan pasangan anggota Pasukan Gerakan Am (PGA), mereka akan mengundi pada Hari Mengundi Awal. Walau bagaimanapun, bagi anggota tentera dan polis yang tidak dapat hadir mengundi awal kerana terpaksa bertugas, mereka layak untuk mengundi secara pos. Kertas undi pos ini akan dihantar kepada anggota tentera dan anggota polis tersebut selepas proses pengeluaran kertas undi pos dilaksanakan. Namun demikian, semua kertas undi pos yang telah ditandakan perlu dihantar dan diterima oleh Pegawai Pengurus selewat-lewatnya pada jam 5.00 petang hari mengundi tersebut.

v. **Penjumlahan Rasmi Undi**

Sebaik saja urusan pengundian selesai, Ketua Tempat Mengundi akan membuat pengiraan kertas undi. Keputusan pengiraan undi ini akan dimasukkan ke dalam Borang 14 (Penyata Pengundian Selepas Pengiraan Undi). Borang 14 ini akan diserahkan kepada Pegawai Pengurus di Pusat Penjumlahan Rasmi Undi (PPRU) untuk dibuat Penjumlahan Rasmi Undi. Pegawai Pengurus akan menyemak Borang 14 dan mengumumkan keputusan bagi setiap saluran tersebut. Sekiranya terdapat keraguan pada Borang 14, semakan semula akan dibuat oleh Pegawai Pengurus sebelum pengumuman keputusan. Apabila semua keputusan Borang 14 dan Borang 15 (Penyata Pengundian Selepas Pengiraan Kertas Undi Pos) telah diterima dan semak, Pegawai Pengurus Bahagian Pilihan Raya terlibat akan menjumlahkan keseluruhan keputusan untuk menentukan pemenang bagi Bahagian Pilihan Raya tersebut.

vi. **Pengumuman Keputusan Pilihan Raya**

Setelah selesai menjumlahkan Borang 14 dan 15, Pegawai Pengurus bagi sesuatu bahagian pilihan raya itu akan mengisytiharkan calon yang mendapat undi majoriti dan mengesahkannya sebagai wakil yang terpilih bagi bahagian pilihan raya yang berkenaan. Keputusannya tidak boleh dipertikaikan. Mana-mana pihak yang tidak berpuas hati dengan keputusan pilihan raya boleh mengemukakan di Mahkamah Pilihan Raya melalui petisyen pilihan raya.

Deposit Pilihan Raya

Bagi calon-calon yang hendak menyertai pilihan raya mereka dikehendaki membayar wang deposit pilihan raya berjumlah seperti berikut:-

1. Pilihan Raya Parlimen RM 10,000.00
2. Pilihan Raya Dewan Undangan Negeri RM 5,000.00

Wang deposit ini perlu dibayar kepada Pegawai Pengurus atau Pengarah Pilihan Raya Negeri selewat-lewatnya pada jam 10.00 pagi pada hari penamaan calon. Deposit Pilihan Raya boleh dibayar dalam bentuk wang tunai atau draf bank.

Calon-calon akan hilang wang deposit sekiranya gagal memperolehi 1/8 daripada jumlah undi yang di perolehi oleh semua calon yang bertanding di dalam sesuatu bahagian pilihan raya berkenaan.

Pasukan Penguat Kuasa Kempen Pilihan Raya (PP-KPR)

Bagi memastikan pilihan raya berjalan lancar, SPR mempunyai kuasa di bawah seksyen 3(d) Akta Pilihan Raya 1958 dan seksyen 27A Akta Kesalahan Pilihan Raya 1954 untuk melantik Pegawai Penguat Kuasa dan membentuk satu atau lebih Pasukan Penguat Kuasa Kempen Pilihan Raya di setiap bahagian pilihan raya Parlimen

Keanggotaan pasukan ini adalah terdiri daripada:-

- a. Pegawai Penguat Kuasa yang dilantik di bawah Seksyen 3(d) Akta Pilihan Raya
- b. Seorang Pegawai Polis yang berpangkat tidak rendah dari Inspektor
- c. Seorang wakil pihak berkuasa tempatan
- d. Seorang wakil parti politik/calon

Fungsi-fungsinya ialah:-

- a. Mengawasi dan memantau semua aktiviti calon
- b. Menurunkan semua bahan kempen yang bercanggah dengan undang-undang pilihan raya
- c. Menghentikan ucapan dan syarahan yang melanggar undang-undang pilihan raya
- d. Mengawal dan menyelaras aktiviti berkempen

Barong SPR

Undang-undang yang ada sekarang melarang calon daripada mendirikan sebarang barong atau pondok panas di dalam kawasan calon itu bertanding. Namun demikian calon-calon dibenarkan untuk mengadakan pejabat parti untuk urusannya di luar kawasan 50 meter dari pusat mengundi. Bagi memastikan kelancaran pengundian, SPR akan mengadakan Barong SPR di pusat-pusat mengundi. Tujuan barong ini diadakan adalah untuk membantu pemilih menyemak nama mereka berada di dalam daftar pemilih dan penentuan pusat dan tempat mengundi mereka supaya pengundian dapat berjalan dengan lancar dan teratur.

Perbelanjaan Pilihan Raya

Calon-calon dibenarkan membelanjakan untuk urusan pilihan raya mereka berdasarkan jumlah berikut :-

- a. Parlimen : Tidak lebih daripada RM200,000.00
- b. Dewan Undangan Negeri : Tidak lebih daripada RM100,000.00

Calon-calon dikehendaki mengemukakan penyata perbelanjaan kepada SPR dalam tempoh 31 hari dari tarikh keputusan pilihan raya di wartakan. Calon-calon dan ejen pilihan raya yang gagal berbuat demikian menyebabkan mereka tidak layak untuk bertanding bagi tempoh lima tahun akan datang.

Jenis-Jenis Pengundian

Terdapat tiga (3) jenis pengundian di Malaysia:

- a. Pengundian biasa melibatkan pemilih-pemilih biasa yang akan mengundi pada hari yang ditetapkan sebagai hari mengundi.
- b. Pengundian awal bagi anggota tentera dan pasangan serta anggota Polis dan pasangan bagi anggota Pasukan Gerakan Am (PGA), dan
- c. Pengundian pos melibatkan Pengundi Tidak Hadir (PTH) Luar Negara dan pengundi-pengundi yang layak serta telah diluluskan oleh SPR sebagai pengundi pos seperti berikut:
 - Anggota polis dan anggota tentera yang tidak dapat hadir mengundi awal kerana bertugas;
 - Petugas pilihan raya;
 - Anggota SPR dan pegawai/kakitangan SPR;
 - Petugas media yang membuat liputan berkaitan pilihan raya pada hari mengundi;
 - Warganegara Malaysia yang bermastautin di luar negara dan bukan merupakan PTH Luar Negara; dan
 - Agensi-agensi yang diluluskan oleh SPR sebagai pengundi pos

Pengundian Awal akan diadakan lebih awal iaitu tidak kurang dari tiga (3) hari sebelum tarikh pengundian biasa. Kertas-kertas undi yang telah ditanda akan disimpan dengan selamat dan akan dibuka untuk pengiraan pada jam 5.00 petang pada hari mengundi.

Pengundi pos pula akan menerima kertas undi masing-masing melalui perkhidmatan penghantaran pos, iaitu selepas Hari Penamaan Calon. Pengundi perlu mengemukakan semula kertas undi pos yang telah ditanda/dipangkah ke Pejabat Pegawai Pengurus Bahagian Pilihan Raya terlibat selewat-lewatnya pada jam 5.00 petang pada hari mengundi.

Alasan-Alasan Petisyen Pilihan Raya

Keputusan pilihan raya hanya boleh di cabar di mahkamah pilihan raya melalui petisyen pilihan raya. Ianya hendaklah di kemukakan dalam tempoh 21 hari dari tarikh keputusan pilihan raya di wartakan. Sesuatu petisyen pilihan raya hanya boleh dibuat atas alasan-alasan berikut:

- a. Sogokan, peras ugut atau sebarang salah laku yang boleh menjejaskan pilihan raya
- b. Ketidak patuhan peruntukan undang-undang dan peraturan pilihan raya.
- c. Perbuatan rasuah atau perbuatan menyalahi undang-undang yang dilakukan oleh calon-calon atau ejen-ejennya.
- d. Calon atau ejennya didapati tidak layak untuk menyertai pilihan raya.

MAKLUMAT UMUM BERKAITAN PEMILIH (PENGUNDI)

1. PENGUNDI BIASA

Adalah mereka yang telah mendaftar sebagai pengundi dan perlu hadir ke Pusat Mengundi untuk mengundi.

2. ANGGOTA POLIS DAN PASANGAN

Anggota polis dan pasangan bagi anggota Pasukan Gerakan Am (PGA) adalah merupakan pengundi awal yang akan mengundi pada Hari Mengundi Awal.

Pasangan bagi anggota polis yang bukan merupakan anggota PGA adalah merupakan pengundi biasa dan mengundi pada hari mengundi.

Walau bagaimanapun, anggota polis yang tidak dapat hadir mengundi awal kerana terpaksa bertugas boleh memohon untuk mengundi secara pos (Kategori 1A).

Borang permohonan boleh diperoleh dari laman web rasmi SPR.

3. ANGGOTA TENTERA DAN PASANGAN

Anggota tentera dan pasangan bagi anggota tentera adalah merupakan pengundi awal yang akan mengundi pada Hari Mengundi Awal.

Walau bagaimanapun, anggota tentera yang tidak dapat hadir mengundi awal kerana terpaksa bertugas boleh memohon untuk mengundi secara pos (Kategori 1A). Borang permohonan boleh diperoleh dari laman web rasmi SPR.

4. PENGUNDI LUAR NEGARA

Pengundi yang bermastautin di luar negara adalah terdiri daripada:

- i. Pengundi yang telah didaftarkan sebagai Pengundi Tidak Hadir (PTH) Luar Negara. PTH Luar Negara secara automatik adalah pengundi pos (tidak perlu memohon untuk mengundi pos). PTH Luar Negara adalah:
 - Penjawat awam yang bertugas di luar negara dan pasangannya; dan
 - Pelajar sepenuh masa di Institut Pengajian Tinggi luar negara dan pasangannya.
- ii. Pengundi yang bermastautin di luar negara (bukan PTH Luar Negara). Mereka boleh memohon secara atas talian (online) untuk mengundi secara pos (Kategori 1B) melalui <https://myspr.spr.gov.my/login>.

5. MEDIA

Anggota media yang membuat liputan pilihan raya semasa Hari Mengundi. Mereka perlu memohon untuk mengundi secara pos (Kategori 1A). Borang permohonan boleh diperoleh dari laman web rasmi SPR.

MAKLUMAT UMUM BERKAITAN PEMILIH (PENGUNDI)

1. 1. Bagaimana untuk menyemak maklumat pemilih/pengundi?

- Lima (5) kemudahan semakan seperti berikut:
 - Portal SPR di pautan <https://www.spr.gov.my> atau <https://mysprsemak.spr.gov.my>.
 - Portal rasmi Pejabat-Pejabat Pilihan Raya Negeri di pautan <http://ppn.spr.gov.my>;
 - Aplikasi dalam talian di pautan <https://myspr.spr.gov.my>;
 - Aplikasi mudah alih MySPR Semak; atau
 - Hotline SPR di talian 03-8892 7018.

2. Bagaimana nak mengundi?

i. Sebelum Pilihan Raya

- Semak butiran peribadi pengundi dalam daftar pemilih melalui Portal SPR, Portal rasmi Pejabat Pilihan Raya Negeri, aplikasi dalam talian (MySPR), aplikasi mudah alih MySPR Semak atau melalui Hotline SPR.
- Selepas pembubaran Parlimen/DUN, semak lokasi pusat mengundi dan tempat mengundi (saluran) yang telah ditetapkan kepada anda.

3. Semasa Tempoh Berkempen

- Kenalilah calon anda semasa tempoh ini.
- Anda juga boleh terlibat dalam aktiviti berkempen untuk calon yang anda sukai dengan syarat sentiasa mematuhi peraturan dan undang-undang yang telah ditetapkan.

4. Semasa Hari Pengundian

- Datang awal ke Pusat Mengundi
- Dapatkan slip Saluran Mengundi di Barong Semakan Daftar Pemilih SPR. Sekiranya nombor saluran mengundi telah diketahui, pengundi boleh terus ke saluran mengundi tanpa perlu ke Barong Semakan Daftar Pemilih terlebih dahulu.

- Beratur dengan senyap di saluran mengundi anda.
- Apabila tiba giliran dan dibenarkan masuk ke saluran mengundi, sila patuhi prosedur mengundi yang telah ditampal di pintu masuk saluran.
- Segera beredar selepas mengundi.

5. **Bagaimana membuat aduan berkenaan pilihan raya**

- Aduan berkenaan pilihan raya boleh dibuat di <https://www.spr.gov.my/ms/aduan-pertanyaan>.

POLIS & TENTERA

- [Bagaimana nak semak?](https://mysprsemak.spr.gov.my/semakan/daftarPemilih/) - <https://mysprsemak.spr.gov.my/semakan/daftarPemilih/>
- Bagaimana nak mengundi?
- [Pengundi Pos](#)

Kategori Pengundi Pos Dalam Negara Dan Luar Negara

KATEGORI PENGUNDI POS DALAM NEGARA

TENTERA

Anggota tentera dan pasangan dikehendaki untuk mengundi semasa Hari Mengundi Awal. Namun bagi anggota yang tidak dapat hadir semasa Hari Mengundi Awal kerana bertugas , mereka boleh memohon untuk mengundi secara pos.

POLIS

Sebagaimana anggota tentera, anggota PDRM dan pasangan Pasukan Gerakan Am (PGA) dikehendaki untuk mengundi semasa Hari Mengundi Awal. Namun bagi anggota yang tidak dapat hadir semasa Hari Mengundi Awal kerana bertugas, mereka boleh memohon untuk mengundi secara pos.

PETUGAS MEDIA

Anggota media yang bertugas membuat liputan penjalanan pilihan raya di luar kawasan juga boleh memohon untuk mengundi secara pos. Mereka perlu mengemukakan permohonan melalui majikan masing-masing.

PETUGAS PILIHAN RAYA

Selain Ahli Suruhanjaya Pilihan Raya dan pegawai-pegawai SPR, petugas-petugas pilihan raya yang dilantik membantu SPR melaksanakan pilihan raya turut diberikan kemudahan untuk memohon mengundi secara pos, terutamanya bagi mereka yang terpaksa mengundi di luar Pusat Mengundi di mana mereka ditetapkan bertugas.

ANGGOTA / PEGAWAI 9 AGENSI KERAJAAN

Anggota/pegawai dari Agensi/Organisasi yang telah diluluskan untuk mengundi pos oleh SPR yang bertugas semasa Hari Mengundi boleh memohon untuk mengundi secara pos. Agensi/Organisasi tersebut adalah:

- Anggota Sukarelawan Simpanan Polis Diraja Malaysia (PVR);
- Anggota Jabatan Bomba dan Penyelamat Malaysia;
- Anggota Agensi Penguatkuasaan Maritim Malaysia (APMM);
- Anggota Jabatan Penjara Malaysia;
- Anggota Jabatan Kesihatan;
- Anggota Jabatan Imigresen Malaysia (JIM);
- Anggota Angkatan Pertahanan Awam Malaysia (APM);
- Anggota Agensi Pengurusan Bencana Malaysia (NADMA);
- Anggota Jabatan Pendaftaran Negara – Urban Transformation Centre (UTC); dan
- Anggota Tenaga Nasional Berhad (TNB).

Permohonan undi pos oleh anggota dan pegawai dari Agensi ini perlu dilakukan secara atas talian (online) di portal MySPR melalui pautan berikut: <https://myspr.spr.gov.my/login>. Garis panduan untuk memohon undi pos secara atas talian (online) pula boleh dimuat turun di laman web SPR.

KATEGORI PENGUNDI POS LUAR NEGARA

WARGANEGARA MALAYSIA DI LUAR NEGARA

Warganegara Malaysia yang berdaftar sebagai pemilih bermastautin di luar negara adalah dibenarkan untuk memohon mengundi secara pos.

PELAJAR DI LUAR NEGARA DAN PASANGAN

Pelajar Malaysia di institusi pengajian tinggi sepenuh masa di luar negara dan pasangannya yang telah didaftarkan sebagai Pengundi Tidak Hadir (PTH) Luar

Negara adalah dikategorikan sebagai pengundi pos secara automatik. Mereka tidak perlu memohon untuk mengundi pos. Apabila telah kembali ke Malaysia, PTH Luar Negara perlu memohon kepada SPR untuk menukar status kepada pengundi biasa.

PENJAWAT AWAM DI LUAR NEGARA DAN PASANGAN

Kelayakan sebagai pengundi pos secara automatik ini juga diperuntukkan kepada penjawat awam yang bertugas di luar negara serta pasangannya yang telah didaftarkan sebagai Pengundi Tidak Hadir (PTH Luar Negara). Mereka tidak perlu memohon untuk mengundi pos. Apabila telah kembali ke Malaysia, PTH Luar Negara perlu memohon kepada SPR untuk menukar status kepada pengundi biasa.

-Pengundi Awal

Pengundi Awal

Bagi anggota Tentera dan pasangan serta anggota Polis & dan pasangan bagi anggota Pasukan Gerakan Am (PGA).

1. Sebelum Pilihan Raya

- Semak butiran peribadi pengundi dalam daftar pemilih melalui Portal SPR, Portal rasmi Pejabat Pilihan Raya Negeri, aplikasi dalam talian (MySPR), aplikasi mudah alih MySPR Semak atau melalui Hotline SPR.
- Selepas pembubaran Parlimen/DUN, semak lokasi pusat mengundi awal dan tempat mengundi (saluran) yang telah ditetapkan kepada anda.

2. Semasa Tempoh Berkempen

- Kenalilah calon anda semasa tempoh ini.
- Anda juga boleh terlibat dalam aktiviti berkempen untuk calon yang anda sukai dengan syarat sentiasa mematuhi peraturan dan undang-undang yang telah ditetapkan.

3. Semasa Hari Pengundian

- Datang awal ke Pusat Mengundi Awal.
- Dapatkan slip saluran mengundi di Barong Semakan Daftar Pemilih SPR. Sekiranya nombor saluran mengundi telah diketahui, pengundi boleh terus ke saluran mengundi tanpa perlu ke Barong Semakan Daftar Pemilih terlebih dahulu.
- Beratur dengan senyap di saluran mengundi anda.

- Apabila tiba giliran dan dibenarkan masuk ke saluran mengundi, sila patuhi prosedur mengundi yang telah ditampal di pintu masuk saluran.

- Segera beredar selepas mengundi.

Semua pengundi awal dikehendaki hadir ke Pusat Mengundi Awal yang telah ditetapkan untuk mengundi dan tidak boleh mengundi pada Hari Mengundi biasa.

- Bagaimana nak mengadu? - <https://www.spr.gov.my/ms/aduan-pertanyaan>

LUAR NEGARA & MEDIA

- Bagaimana nak semak? - <https://mysprsemak.spr.gov.my/semakan/daftarPemilih>
- Bagaimana nak mengundi?
- [Pengundi Pos](#)
- Bagaimana nak mengadu? - <https://www.spr.gov.my/ms/aduan-pertanyaan>

FAKTA-FAKTA UMUM UNTUK CALON (DUN)

1. Menjadi Ahli Dewan Undangan Negeri.

Untuk menjadi seorang ahli Dewan Undangan Negeri (DUN) bagi mana-mana negeri maka orang itu mestilah dicalonkan dan memenangi pilihan raya DUN.

2. Syarat Kelayakan Menjadi Calon

Pilihan Raya Dewan Undangan Negeri

- Seorang warganegara Malaysia dan bermastautin di dalam negeri di mana ia ingin bertanding.
- Berumur tidak kurang daripada 21 tahun atau 18 tahun berdasarkan peruntukan-peruntukan Perlembagaan Persekutuan atau Perlembagaan Negeri/Undang-Undang Tubuh Kerajaan/Undang-Undang Perlembagaan Tubuh Kerajaan/Undang-Undang Bagi Diri Kerajaan negeri masing-masing pada hari penamaan calon.

3. Hilang Kelayakan Menjadi Calon

- i. Didapati atau disahkan sebagai orang tidak sempurna akal;
- ii. Seseorang bankrap yang belum lepas;
- iii. Seseorang yang memegang "jawatan berpendapatan";
- iv. Seseorang itu apabila telah dicalonkan untuk pilihan raya Dewan Rakyat atau Dewan Undangan Negeri atau menjadi Ejen Pilihan Raya kepada orang yang telah dicalonkan, dia telah gagal untuk mengemukakan penyata perbelanjaan pilihan raya seperti yang dikehendaki oleh undang-undang di dalam masa dan cara yang dikehendaki;
- v. Seseorang yang telah disabitkan dengan kesalahan oleh mahkamah di dalam Persekutuan (atau sebelum hari Malaysia di dalam kawasan-kawasan Sabah atau Sarawak atau Singapura) dan dihukum penjara selama tempoh tidak kurang daripada satu (1) tahun atau didenda tidak kurang daripada dua ribu ringgit Malaysia (RM2,000.00) dan belum menerima pengampunan;
- vi. Didapati telah mendapat kewarganegaraan atau telah menggunakan hak kewarganegaraan negara asing atau telah membuat pengakuan taat setia kepada mana-mana negara asing.

4. **Deposit**

Undang-undang menetapkan seseorang yang ingin bertanding dalam pilihan raya dikehendaki mengemukakan wang deposit sebanyak **RM 5,000.00**. Jika wang deposit tidak disertakan, kertas penamaannya dianggap sebagai tidak lengkap dan Pegawai Pengurus berkuasa untuk tidak menerima kertas penamaan tersebut.

5. **Deposit Bahan Kempen Pilihan Raya**

Calon-calon hendaklah membayar deposit bahan kempen pilihan raya sebanyak **RM3,000.00**. Calon yang gagal mengemukakan deposit bahan kempen adalah tidak dibenarkan untuk memasang atau mempamer sebarang bahan kempen pilihan raya. Jika disabit kesalahan di bawah Sekyen Akta Kesalahan Pilihan Raya 1954 berkaitan dengan pekara tersebut, Calon berkenaan boleh dihukum penjara selama tidak melebihi satu tahun atau denda tidak melebihi tiga ribu ringgit atau kedua-duanya sekali.

6. **Keistimewaan Untuk Seseorang Calon Pada Hari Mengundi**

Calon adalah dibenarkan melawat tempat-tempat berikut:

- a. Tempat mengundi/mengira undi.

- b. Pusat mengira undi awal.
- c. Pusat pengeluaran, pembukaan dan pengiraan undi pos.
- d. Pusat Penjumlahan Rasmi Undi.

PARTI YANG BERDAFTAR DENGAN SPR (DIKEMASKINI SEHINGGA 30 SEPTEMBER 2024)

NAMA PARTI

- BARISAN NASIONAL OF MALAYSIA (BN)
- PARTI PESAKA BUMIPUTRA BERSATU SARAWAK (PBB)
- PARTI Keadilan Rakyat (PKR)
- PARTI ISLAM SE MALAYSIA (PAS)
- PARTI RAKYAT MALAYSIA (PRM)
- PERTUBUHAN KINABALU PROGRESIF BERSATU (UNITED PROGRESSIVE KINABALU ORGANISATION) (UPKO)
- DEMOCRATIC ACTION PARTY, MALAYSIA (DAP)
- PARTI LIBERAL DEMOKRATIK (THE LIBERAL DEMOCRATIC PARTY) (LDP)
- PARTI BERSATU SASA MALAYSIA (MALAYSIA UNITED PEOPLE'S PARTY) (BERSAMA)
- PARTI MAJU SABAH (PMS) (SABAH PROGRESSIVE PARTY (SAPP)
- PARTI ASPIRASI RAKYAT SARAWAK (SARAWAK PEOPLE'S ASPIRATION SARAWAK) (ASPIRASI)
- KONGRES INDIAN MUSLIM MALAYSIA (KIMMA)
- PARTI GERAKAN RAKYAT MALAYSIA (MALAYSIAN PEOPLE`S MOVEMENT PARTY) (GERAKAN)
- BARISAN KEMAJUAN INDIA SE-MALAYSIA (ALL MALAYSIAN INDIAN PROGRESSIVE FRONT) (AMIPF)
- PARTI PUNJABI MALAYSIA (MALAYSIAN PUNJABI PARTY) (PPM)
- PERTUBUHAN KEBANGSAAN MELAYU BERSATU (UNITED MALAYS NATIONAL ORGANISATION) (UMNO)

- PARTI AMANAH NEGARA (AMANAH)
- PARTI RAKYAT BERSATU SARAWAK (SARAWAK UNITED PEOPLES' PARTY) (SUPP)
- PARTI DEMOKRATIK PROGRESIF SARAWAK (SARAWAK PROGRESSIVE DEMOCRATIC PARTY) (PDP)
- THE MALAYSIAN INDIAN CONGRESS (MIC)
- PARTI BERSATU RAKYAT SABAH (PBRs)
- BARISAN JAMAAH ISLAMIAH SE MALAYSIA (BERJASA)
- MALAYSIAN CHINESE ASSOCIATION (MCA)
- MALAYSIAN CEYLONese CONGRESS (MCC)
- PARTI MAKKAL SAKTI MALAYSIA (MALAYSIA MAKKAL SAKTI PARTY) (M.M.S.P.)
- PARTI SOSIALIS MALAYSIA (BARU) (SOCIALIST PARTY OF MALAYSIA) (SPM) (PSM)
- PARTI RAKYAT SARAWAK (PRS)
- PARTI CINTA MALAYSIA (PCM)
- PARTI PERPADUAN RAKYAT SABAH (PPRS)
- PERTUBUHAN KEBANGSAAN SABAH BERSATU (UNITED SABAH NATIONAL ORGANISATION) (USNO)
- PARTI KERJASAMA ANAK NEGERI (ANAK NEGERI)
- PEOPLE'S ALLIANCE FOR JUSTICE OF PEACE (PEACE PARTY –SARAWAK)
- PARTI TENAGA RAKYAT SARAWAK (TERAS)
- PARTI KEBANGSAAN SABAH (PKS)
- PARTI SEJAHTERA ANGKATAN PERPADUAN SABAH (SAPU)
- PARTI SARAWAK BERSATU (PSB)
- PARTI ALTERNATIF RAKYAT (PEOPLE'S ALTERNATIVE PARTY) (PAP)
- PARTI CINTA SABAH (PCS)
- PARTI WARISAN SABAH (WARISAN)
- PARTI PRIBUMI BERSATU MALAYSIA (BERSATU)
- PARTI SOLIDARITI TANAH AIRKU (STARSABAH)

- PARTI HARAPAN RAKYAT SABAH (HARAPAN RAKYAT)
- PARTY BUMI KENYALANG (PBK)
- PARTI IKATAN BANGSA MALAYSIA (IKATAN)
- PARTI BERSAMA MALAYSIA (MALAYSIAN UNITED PARTY) PBM (MU)
- PERTUBUHAN PERPADUAN RAKYAT KEBANGSAAN SABAH (PERPADUAN)
- PENANG FRONT PARTY (PEP)
- PARTI DAMAI SABAH (SABAH PEACE PARTY) (SPP)
- PARTI BERSATU SABAH (SABAH UNITED PARTY) (PBS)
- PAKATAN HARAPAN (PH)
- GABUNGAN PARTI SARAWAK (GPS)
- PARTI BUMIPUTERA PERKASA MALAYSIA (PUTRA)
- PARTI SEDAR RAKYAT SARAWAK (SEDAR)
- PARTI GAGASAN RAKYAT SABAH (PGRS)
- PERIKATAN NASIONAL (PN)
- PARTI KEMAJUAN MALAYSIA (MALAYSIAN ADVANCEMENT PARTY) (MAP)
- PARTI PEJUANG TANAH AIR (PEJUANG)
- PARTI PERIKATAN INDIA MUSLIM NASIONAL (IMAN)
- PARTI BANGSA DAYAK SARAWAK (PBDS)
- PARTI BANGSA MALAYSIA (PBM)
- IKATAN DEMOKRATIK MALAYSIA (MALAYSIAN UNITED DEMOCRATIC ALLIANCE) (MUDA)
- PARTI GABUNGAN RAKYAT SABAH (GRS)
- PARTI KESEJAHTERAAN DEMOKRATIK MASYARAKAT (KDM)
- PARTI UTAMA RAKYAT (PUR)
- PARTI RAKYAT INDIA MALAYSIA (PRIM)
- PARTI ORANG ASLI MALAYSIA (ASLI)

- MALAYSIAN PEOPLE'S PROGRESSIVE PARTY (MYPPP)

JUMLAH : 67 PARTI BERDAFTAR

FAKTA-FAKTA UMUM UNTUK PARTI POLITIK

Deposit

Deposit Pilihan Raya:

- Parlimen: RM 10,000
- DUN: RM 5,000

Deposit Bahan Kempen:

- Parlimen: RM 5,000
- DUN: RM 3,000

Kedua-dua deposit pilihanraya dan deposit bahan kempen boleh dibayar di Pusat Penamaan Calon atau di Pejabat Pilihan Raya Negeri atau Pejabat Pegawai Pengurus Pilihan Raya bagi Bahagian Pilihan Raya berkenaan.

Pelantikan Petugas

Pegawai Pengurus boleh melantik Petugas-petugas Pilihan Raya yang akan membantunya dalam melaksanakan sesuatu pilihan raya.

Kategori Petugas

- Pembantu Pilihan Raya (PPR)
- Ketua Tempat Mengundi (KTM)
- Penyelia Pusat Mengundi (PPM)
- Kerani Pengundian/Kerani Mengira Undi (KP/KMU)
- Kerani Penyemak Daftar Pemilih (KPDP)
- Kerani Pengeluaran, Pembukaan dan Pengiraan Undi Pos (KUP)
- Pemandu Arah Pusat Mengundi (PAPM)

Imbuhan Petugas

Berdasarkan surat Kementerian Kewangan Malaysia rujukan surat KK/BP/DS(S)221/796/6(SK.1/2012)(18), Perbendaharaan telah bersetuju memberi imbuhan kepada petugas-petugas pilihan raya.

Ciri-ciri perlu ada pada petugas

- Jujur dan Amanah
- Adil
- Bertanggungjawab
- Cekap dan Telus

Persempadanan Bahagian-Bahagian Pilihan Raya

Bahagian-bahagian pilihan raya dibentuk untuk menentukan kawasan di mana seorang wakil rakyat akan dipilih untuk mewakili suara pemilih di **Dewan Rakyat** mahupun di **Dewan Undangan Negeri**.

Bahagian Pilihan Raya Terdiri Daripada 3 Komponen Utama:

1. Bahagian Pilihan Raya Persekutuan

- Juga dikenali dengan nama "Kawasan Parlimen".
- Diwakili oleh seorang Ahli Dewan Rakyat.
- Terdiri daripada gabungan beberapa DUN (kecuali bagi Wilayah Persekutuan yang hanya mempunyai Kawasan Parlimen sahaja).

2. Bahagian Pilihan Raya Negeri

- Juga dikenali dengan nama "Kawasan DUN".
- Diwakili oleh seorang Ahli Dewan Undangan Negeri.
- Terdiri daripada gabungan beberapa Daerah Mengundi.

3. Daerah Mengundi

- Kawasan kecil dalam Bahagian Pilihan Raya Negeri atau Persekutuan (bagi Wilayah Persekutuan).

- Bagi memudahkan penetapan pusat mengundi.
- Terdiri daripada gabungan beberapa Lokaliti.
- **Lokaliti** adalah unit terkecil dalam Bahagian Pilihan Raya yang ditentukan berdasarkan alamat pada kad pengenalan.

Sistem Kod Digunakan untuk Mengenal Pasti Bahagian Pilihan Raya, Daerah Mengundi, dan Lokaliti dengan Mudah

- **Kod Bahagian Pilihan Raya Persekutuan (Parlimen)**
- **Kod Bahagian Pilihan Raya Negeri (DUN)**
- **Kod Daerah Mengundi**
- **Kod Lokaliti**

Persempadanan Bahagian-Bahagian Pilihan Raya Dibentuk Berlandaskan Peruntukan Undang-Undang Seperti Berikut:

1. **Perkara 113 (2)**
Tugas SPR menjalankan urusan kajian semula persempadanan bahagian-bahagian pilihan raya.
2. **Perkara 113 (2A)**
Urusan kajian semula persempadanan bahagian-bahagian pilihan raya dilakukan bila ada lapan (8) tahun selepas kajian terakhir.
3. **Perkara 113 (3A)**
Kajian semula perlu diselesaikan dalam tempoh tidak lebih dari dua (2) tahun.
4. **Perkara 113 (6)**
Urusan kajian semula persempadanan dilakukan berkaitan pindaan Perkara 46 iaitu mengenai bilangan Dewan Rakyat dan peruntukan bilangan kerusi Dewan Undangan Negeri oleh Badan Perundangan sesebuah Negeri.
5. **Perkara 113 (10)**
Mematuhi kepada Jadual Ketiga Belas.

6. **Perkara 113 (3B)**

Kajian semula persempadanan secara keseluruhan serta urusan penambahan bilangan kerusi Parlimen atau Dewan Undangan Negeri-Negeri berdasarkan pindaan Perkara 46 Perlembagaan Persekutuan dijalankan di seluruh Tanah Melayu, Sabah, dan Sarawak.

7. **Perkara 113 (6)**

Tarikh bermulanya kajian semula ditentukan dalam Seksyen 4 Jadual Ketiga Belas dalam Warta.

8. **Perkara 113 (10)**

Tarikh siapnya kajian ditentukan di bawah Fasal (2) atau Fasal (3A) dengan laporan yang dikemukakan kepada Perdana Menteri.

9. **Perkara 115 (2)**

Pelantikan dua orang penasihat dari kalangan pegawai kerajaan persekutuan yang mempunyai pengetahuan dalam hal topografi dan taburan penduduk.

10. **Perkara 115 (2)**

Penasihat berperanan membantu SPR dalam urusan ini dan biasanya dilantik dari Jabatan Perangkaan Malaysia dan Jabatan Ukur dan Pemetaan Malaysia.

11. **Perkara 116**

Jumlah ahli Dewan Rakyat hendaklah sama dengan bilangan bahagian pilihan raya Parlimen.

12. **Perkara 117**

Jumlah ahli Dewan Undangan Negeri hendaklah sama dengan bilangan bahagian pilihan raya Negeri.

Akta Pilihan Raya 1958 (Akta 19) Seksyen 7

- Membahagikan setiap Bahagian Pilihan Raya kepada daerah-daerah mengundi, memberikan kod, menetapkan pusat mengundi, dan menyiarkan dalam Warta.

Akta Suruhanjaya Siasatan 1950 (Akta 119)

- Semasa SPR menjalankan Siasatan Tempatan, SPR mempunyai kuasa sebagaimana yang diperuntukkan kepada Suruhanjaya Siasatan yang ditubuhkan di bawah Akta ini.

Bagaimana menukar alamat di dalam daftar pemilih SPR daripada alamat asal kepada alamat baru seperti di dalam Kad Pengenalan?

- Mereka boleh berurusan dengan semua Pusat Pendaftaran dan Penolong Pendaftar Pemilih yang dibenarkan oleh SPR untuk membuat pendaftaran tukar alamat.

Dimanakah saya boleh membuat semakan status pendaftaran?

- Di Ibu Pejabat Pilihan Raya SPR, Malaysia.
- Di Pejabat Pilihan Raya Negeri.
- Sistem Semakan Daftar Pemilih.
- Aplikasi Mudah Alih MySPR Semak.
- Unit Outreach SPR.

Apakah prosedur yang harus diikuti sekiranya pemilih ingin membuat pindaan maklumat seperti agama dan bangsa?

- Pindaan butiran maklumat seperti agama dan bangsa boleh dibuat di Pejabat Pilihan Raya Negeri di seluruh negara dengan mengemukakan Kad Pengenalan dan bukti-bukti dokumen lain yang berkaitan.

Berapa lamakah tempoh yang diperlukan oleh SPR untuk membuat pembetulan maklumat seperti agama, bangsa, dan Kad Pengenalan?

- Pembetulan butiran kecil seperti agama dan bangsa akan diambil tindakan segera setelah permohonan dibuat di Pejabat Pilihan Raya Negeri dan dihantar ke Ibu Pejabat SPR untuk kelulusan.
- Pembetulan nama dan maklumat lain yang tertera di dalam Kad Pengenalan dibuat oleh Ketua Pendaftar dalam tempoh dua (2) minggu.
- Untuk memastikan maklumat pemilih tepat dan terkini, dinasihatkan agar pemilih menyemak nama mereka dan jika ada keperluan, boleh membuat permohonan untuk pembetulan berdasarkan maklumat dalam Kad Pengenalan.

Terdapat pasangan suami/isteri yang mengundi di tempat yang berlainan. Mengapa hal ini berlaku?

- Ini mungkin berlaku kerana suami/isteri mendaftar menggunakan alamat yang berbeza.

- Jika mereka mendaftar di alamat yang sama, kemungkinan ia berpunca dari kesilapan semasa kemasukan data oleh kakitangan SPR, terutamanya di kawasan yang mempunyai nama-nama tempat yang serupa.

Mengapa wujudnya nombor Kad Pengenalan yang sepatutnya lelaki tetapi digunakan oleh perempuan?

- Ini mungkin berpunca dari kesilapan semasa pendataan di peringkat JPN atau semasa pendaftaran pemilih oleh kakitangan SPR.

Kenapa wujud perbezaan nombor Kad Pengenalan dalam daftar pemilih dengan Kad Pengenalan asal?

- Perbezaan nombor Kad Pengenalan mungkin berpunca dari sistem pendaftaran lama. Di bawah sistem pendaftaran semasa, SPR menghubungi JPN secara online, mengurangkan risiko kesilapan tersebut.

Adakah boleh kita menukar nama seseorang yang memeluk agama Islam kepada nama Islamnya sedangkan dalam pangkalan data masih nama asal?

- Tidak boleh. Seseorang yang memeluk agama Islam perlu menukar nama di dalam Kad Pengenalan terlebih dahulu sebelum nama Islam boleh dimasukkan dalam Daftar Pemilih.

Mengapa nama pemilih masih kekal di tempat mengundi asal walaupun beliau telah membuat permohonan untuk pertukaran di alamat yang baru?

- Permohonan pertukaran alamat tidak sama dengan alamat yang tertera dalam Kad Pengenalan, terutamanya bagi permohonan yang dibuat sebelum 16 Julai 2002.
- Sebarang permohonan untuk pertukaran alamat dalam daftar pemilih hendaklah mengikut alamat dalam Kad Pengenalan.
- Pemilih yang ingin berpindah tempat mengundi perlu memohon untuk pertukaran alamat di JPN terlebih dahulu sebelum memohon pertukaran alamat tempat mengundi.

Apakah prosedur bagi pemilih berdaftar membuat pertukaran alamat pusat mengundi dan di manakah urusan tersebut boleh dibuat?

- Pemilih berdaftar yang telah berpindah alamat boleh menukar alamat pusat mengundi dengan menukar alamat dalam Kad Pengenalan di JPN terlebih dahulu.
- Bawa resit pertukaran alamat dari JPN dan pergi ke kaunter SPR untuk membuat permohonan pertukaran alamat pusat mengundi dengan mengisi Borang A.

- Urusan pertukaran alamat pusat mengundi hanya boleh dibuat di kaunter-kaunter SPR di Ibu Pejabat SPR, Pejabat Pilihan Raya Negeri, dan Pejabat Pos berkomputer.

Kenapakah SPR tidak boleh menukarkan alamat pusat mengundi secara automatik apabila seseorang itu telah menukar alamat bermastautin dalam Kad Pengenalan?

- Mengikut Perkara 119(4) Perlembagaan Persekutuan, jika pemilih berdaftar tidak membuat permohonan untuk bertukar pusat mengundi, namanya tetap disenaraikan di alamat asal tempat dia mendaftar sebagai pemilih, walaupun dia telah menukar alamat dalam Kad Pengenalan.
- Peraturan 12(2) Peraturan-Peraturan Pilihan Raya (Pendaftaran Pemilih) 2002 menetapkan bahawa SPR hanya boleh menukar alamat pusat mengundi jika pemilih berkenaan memohon pertukaran dan mengisi Borang A seperti yang ditetapkan.

Kelayakan untuk Keluar Mengundi

1. **Apakah yang melayakkan seseorang untuk keluar mengundi?**
Warganegara Malaysia yang layak, yang telah berdaftar sebagai pemilih, dan namanya terdapat dalam Daftar Pemilih yang digunakan dalam pilihan raya.

Deposit Pilihan Raya

2. **Berapakah jumlah wang deposit pilihan raya yang perlu dibayar untuk bertanding bagi Parlimen dan DUN?**
 - RM 10,000 untuk deposit calon Parlimen
 - RM 5,000 untuk deposit bahan kempen Parlimen
 - RM 5,000 untuk deposit calon DUN
 - RM 3,000 untuk deposit bahan kempen DUN
3. **Bagi seseorang calon yang ingin bertanding untuk kawasan DUN dan Parlimen, perlukah dia membayar kedua-dua deposit calon untuk DUN dan Parlimen?**
Ya, calon yang ingin bertanding bagi DUN dan Parlimen perlu membayar:
 - RM 5,000 untuk deposit calon DUN

- RM 10,000 untuk deposit calon Parlimen
Kedua-dua deposit pilihan raya dan deposit bahan kempen boleh dibayar di Pusat Penamaan Calon, Pejabat Pilihan Raya Negeri, atau Pejabat Pegawai Pengurus Pilihan Raya.

4. Jumlah deposit pilihan raya:

- **Parlimen:** RM 10,000
- **DUN:** RM 5,000
Deposit Bahan Kempen:
- **Parlimen:** RM 5,000
- **DUN:** RM 3,000

Penamaan Calon dan Semakan Tempat Mengundi

5. Di manakah pusat penamaan calon dan pukul berapa penamaan calon dibuka?

Pusat penamaan calon biasanya ditetapkan di Pejabat Daerah, Majlis Perbandaran, Majlis Daerah, Dewan Orang Ramai, bangunan sekolah, atau tempat lain yang sesuai.

Penyerahan Kertas Penamaan Calon dibuka dari jam 9.00 pagi hingga 10.00 pagi.

6. Bagaimanakah cara untuk seseorang pemilih berdaftar membuat semakan tempat mengundi yang betul?

Pemilih boleh membuat semakan melalui:

- **Portal Rasmi SPR:** www.spr.gov.my
- **Telefon:** Ibu Pejabat SPR di Putrajaya (03-8892 7018)
- **Portal MySPR Semak:** <https://mysprsemak.spr.gov.my>
- **Pejabat Pilihan Raya Negeri**

Pusat Mengundi dan Waktu Pengundian

7. Mengapakah sesetengah pusat mengundi mempunyai beberapa saluran?

Pusat mengundi mempunyai beberapa saluran untuk menampung jumlah pengundi berdaftar yang ramai di kawasan tersebut. Setiap saluran bagi pengundi biasa menampung tidak lebih daripada 750 pengundi, manakala bagi warga emas dan

OKU, tidak melebihi 450 pengundi.

Ini untuk mengelakkan kesesakan dan mengurangkan masa menunggu untuk mengundi.

8. Bilakah bermulanya waktu membuang undi?

- Di Semenanjung Malaysia: 8.00 pagi hingga 6.00 petang.
- Di Sabah dan Sarawak: 7.30 pagi hingga 5.30 petang.
Namun, saluran tertentu mungkin ditutup lebih awal bergantung pada keadaan geografi dan jumlah pengundi.

Dokumen yang Diperlukan untuk Mengundi

9. Dokumen yang diperlukan untuk mengundi:

- **Kad Pengenalan:** MyKad, Kad Pengenalan lama (KPT), atau Kad Pengenalan Plastik Biru.
- **Jika kehilangan Kad Pengenalan:** Pemilih berdaftar boleh mengemukakan Resit JPN.KP 9 atau Resit JPN.KP11 yang disahkan oleh Jabatan Pendaftaran Negara.
- **Dokumen lain yang diterima:**
 - Pasport Malaysia Terhad
 - Pasport Malaysia
 - Lesen Memandu bergambar
 - Kad Rasmi Pengenalan Diri yang dikeluarkan oleh mana-mana pihak berkuasa kerajaan

10. Bagi pemilih yang telah mengetahui nombor saluran Tempat Mengundi, adakah perlu menyemak semula di barung SPR?

Pemilih yang telah mengetahui nombor saluran tidak perlu menyemak di barung SPR. Mereka boleh terus ke saluran yang berkenaan untuk menunggu giliran mengundi.

Tuntutan Deposit Pilihan Raya

11. Bilakah boleh dituntut deposit pilihan raya?

Deposit pilihan raya boleh dituntut selepas keputusan pilihan raya diisytiharkan oleh Pegawai Pengurus jika calon memperoleh lebih daripada 1/8 undi yang diterima oleh calon-calon yang bertanding.

Deposit bahan kempen boleh dituntut selepas bahan kempen dibersihkan dan disahkan oleh pihak berkuasa tempatan.

Saluran Khas untuk Pengundi Tertentu

12. Adakah SPR menyediakan saluran khas untuk warga tua, OKU, dan wanita mengandung?

Ya, SPR menyediakan **Saluran 1** untuk warga emas.

Ketua Tempat Mengundi juga diberi kuasa untuk memberi keutamaan kepada wanita mengandung dan OKU.

Pertanyaan dan Isu Penamaan Calon

13. Seseorang ingin bertanding untuk DUN dan Parlimen di tempat yang berbeza. Bagaimana mengatasinya?

SPR akan sedaya upaya menetapkan pusat penamaan calon di tempat yang sama. Jika terpaksa dibuat di dua tempat yang berbeza, pencadang atau penyokong boleh menyerahkan Kertas Penamaan bagi pihak calon.

Masalah Pengundian

14. Orang ingin mengundi tetapi namanya telah ditanda sebagai telah pun keluar mengundi. Apa yang berlaku?

Orang tersebut tidak boleh mengundi.

15. Adakah seseorang boleh menggunakan Kad Pengenalan orang lain untuk mengundi?

Tidak dibenarkan.

Elaun Petugas Pilihan Raya

16. Kenapa elaun petugas pilihan raya lambat diterima?

Pejabat Pilihan Raya Negeri perlu memproses bayaran mengikut prosedur kewangan yang ditetapkan. Kelewatan boleh berlaku jika terdapat kesilapan maklumat akaun, nombor Kad Pengenalan, atau nama petugas.

Laporan Mengenai Larangan Mengundi

17. Jika seseorang tidak dibenarkan mengundi, di manakah beliau boleh membuat laporan?

Laporan boleh dibuat di balai polis berdekatan.

Pengundi Bantuan

18. Bolehkah orang lain mengundi bagi pihak seseorang?

Tidak boleh, kecuali dalam kes pengundi cacat penglihatan, yang perlu ditemani oleh seseorang yang dipercayai oleh pengundi untuk membantunya memangkah kertas undi. Orang yang membantu perlu mengisi Borang 10 terlebih dahulu.

Penggunaan Pen untuk Menandakan Kertas Undi

19. Kenapa penggunaan pen tidak dibenarkan untuk menandakan kertas undi?

Penggunaan pen dibenarkan. SPR menyediakan pen di tempat mengundi untuk memudahkan pengundi.

20. Jika seseorang pengundi menandakan kertas undi di luar petak undi, adakah kertas undi diterima?

Ya, kertas undi boleh diterima selagi niat pemilih untuk memilih calon pilihannya jelas dan ditanda di dalam petak yang dikhaskan.

Pengundian Pos

21. Bolehkah orang yang mendaftar di Sabah dan Sarawak tetapi bermastautin di Semenanjung memohon mengundi secara pos?

Tidak boleh, kecuali bagi mereka yang tertakluk di bawah Peraturan 3(1)(a)-(f), Peraturan-Peraturan Pilihan Raya (Pengundian Pos) 2003.